



CONVENIO DE COLABORACIÓN ENTRE A AXENCIA GALEGA DAS INDUSTRIAS CULTURAIS E A ASOCIACIÓN DE PROFESIONAIS DE CIRCO DE GALICIA PARA A REALIZACIÓN DE ACTIVIDADES PARA A PROMOCIÓN, VISIBILIZACIÓN E FOMENTO DO NOVO CIRCO GALEGO EN 2026

Santiago de Compostela

COMPARECEN

Por unha banda, José Carlos López Campos, en representación da Axencia Galega das Industrias Culturais, no sucesivo Agadic, con NIF Q-6550009-B, actuando no seu nome e representación en virtude do establecido pola Lei 4/2008, do 23 de maio, de creación da Axencia Galega das Industrias Culturais, e o Decreto 150/2012, de 12 de xullo, polo que se aproba o Estatuto da Axencia Galega das Industrias Culturais.

E por outra, Isaac Rodríguez Miranda, en calidade de presidente da Asociación de Profesionais de Circo de Galicia (en adiante Asociación), con NIF G70315320, con poderes suficientes para actuar no nome da entidade en virtude do establecido nos seus estatutos e segundo a certificación de 6.6.2023 da Consellería de Presidencia, Xustiza e Deportes relativa ao órgano de representación da Asociación elixido pola asemblea xeral do 29.4.2023.

As dúas partes interveñen en función dos seus respectivos cargos e no exercicio das súas facultades que para convir no nome das entidades que representan teñen conferidas, e

EXPOÑEN

Primeiro. A Axencia Galega das Industrias Culturais (Agadic), creada pola Lei 4/2008, do 23 de maio, de creación da Axencia Galega das Industrias Culturais, é unha axencia pública con personalidade xurídica propia, patrimonio propio e autonomía na súa xestión, segundo establece o artigo 1.2 da citada Lei.

O obxecto da Axencia é, entre outros, o fomento da oferta de bens e servizos culturais, fixado polo artigo 3.1 da Lei, e entre as súas funcións está a de favorecer os produtos que difundan a lingua, a cultura e as tradicións propias de Galicia (artigo 5.b da Lei 4/2008). Para o logro dos seus obxectivos, a Agadic poderá subscribir convenios, realizar actividades comerciais e industriais, conceder subvencións e establecer calquera outra iniciativa de acción tendente á consecución dos obxectivos que se lle atribúen (artigo 5.2 da Lei 4/2008).





Segundo. A Asociación de Profesionais de Circo de Galicia é, segundo os seus estatutos, unha organización de natureza asociativa e sen ánimo de lucro que ten como fins principais, entre outros, a representación das diferentes ramas profesionais do circo de Galicia (artistas, técnicos, formadores, empresarios, xestores, directores...), divulgar e normalizar o circo en todas as súas modalidades e situalo como un feito cultural de seu, promover o debate e a cohesión do sector circense proporcionando ferramentas de profesionalización e traballando con outras entidades en proxectos de promoción do sector, apoiar e xerar espazos de creación, aprendizaxe e adestramento na comunidade autónoma de Galicia. E para o cumprimento destes fins, a Asociación poderá promover e organizar conferencias, cursos divulgativos, proxeccións, concursos e outras actividades.

A Asociación de Profesionais de Circo de Galicia é unha entidade que representa os profesionais do novo circo galego. Fundada no ano 2011, ten como obxectivo aunar o sector do circo na comunidade galega, proporcionar un ente que facilite a interlocución cos organismos públicos e que aglutine a todos os profesionais do sector, incluíndo creadores, artistas, xestores, produtores, distribuidores e programadores. A Asociación busca darlle unha identidade propia ao circo en Galicia, recoñecendo e potenciando esta arte escénica como clave para a cultura e como un ben de interese público presente na vida cultural, social, educativa e económica da comunidade.

A súa pertenza a CircoRed, a Federación de Asociacións de Profesionais de Circo de España, que aglutina as distintas asociacións de profesionais de circo do Estado, asegura e fortalece a representación do circo galego nos foros de decisión, axudando a que esta arte escénica teña a visibilidade e o apoio que merece tanto a nivel nacional como internacional, e facilítalles, así mesmo, aos profesionais do circo galego o acceso a recursos, formación e oportunidades de exhibición e distribución.

Terceiro. A Asociación, atendendo aos seus fins, vén desenvolvemento de forma continuada unha serie de iniciativas que redundan na defensa e potenciación deste sector artístico, que se consolidou como oferta cultural na nosa comunidade nas últimas dúas décadas.

Ademais do seu importante traballo nas diferentes comisións das que forma parte, entre as que destaca o grupo de traballo dentro de CircoRed para a elaboración do anteproxecto de lei das ensinanzas artísticas co fin de que esta disciplina artística fora recoñecida dentro do sistema educativo, e na súa participación nos congresos e mesas máis relevantes do sector nos últimos anos, a entidade centra unha parte importante do seu labor no ámbito formativo, promovendo formación específica e de interese para os profesionais do circo co desenvolvemento de cursos prácticos e presenciais que proporcionan ferramentas claves para mellorar a calidade e competitividade dos creadores do sector do circo galego, fomentando a súa profesionalización e potenciando a súa capacidade para posicionarse no mercado cultural. Pero tamén pon empeño a Asociación no ámbito investigador, centrando os seus esforzos na construción do Arquivo online do Novo Circo Galego, un ambicioso traballo, pioneiro en Galicia, que visibiliza e deixa rexistro da historia actual do novo circo





na nosa comunidade e co que se pretende preservar e difundir o legado circense facilitando o acceso a materiais históricos para investigadores, estudantes e público xeral.

A este esforzo nos ámbitos formativo e investigador sumou en 2024 unha nova iniciativa que responde á necesidade de realizar un evento que recoñeza o esforzo dos profesionais do circo á vez que sirva de escaparate para promocionar e facer visible a calidade dos seus traballos, como ocorre cos premios María Casares no ámbito escénico, os Martín Códax no ámbito musical e os Mestre Mateo no audiovisual. Coa creación dos "Premios de Novo Circo Manu Lago", que celebra en 2026 a súa terceira edición, ademais de honrar a memoria dun dos artistas que máis fixo pola consolidación no novo circo galego, o pallaso e malabarista Manu Lago, palíase unha carencia de recoñecemento e de prestixio desta arte, que xa está máis que asentada en Galicia pero que ata o de agora carecía deste merecido escaparate do talento dos profesionais que se dedican ao circo en todas as súas vertentes.

Cuarto. A Agadic presta especial atención ao eido do asociacionismo profesional apoiando medidas e iniciativas concretas das diferentes entidades aglutinadoras do sector profesional que desenvolven unha actividade crecente tanto de cara ao servizo dos asociados coma á visibilización do tecido profesional dos diferentes sectores culturais. E todo ese esforzo no fomento do sector do circo que realiza a Asociación tanto a nivel representativo como de dinamización e promoción coincide plenamente coas liñas de traballo da Agadic no que atinxe ao impulso da cooperación e do asociacionismo nos distintos sectores culturais, así como no establecemento de medidas para aumentar a visibilidade deste sector da cultura, de divulgar e normalizar o circo en todas as súas modalidades e de situalo á par doutras artes escénicas.

A pesar de que o circo é unha arte escénica plenamente consolidada a nivel internacional, o Novo Circo —entendido como circo contemporáneo, sen uso de animais, con dramaturxia propia e cun enfoque artístico centrado no concepto do espectáculo— precisa dun labor constante de difusión, sensibilización e comunicación, polo que é necesario seguir profundando no impulso, recoñecemento e integración plena do sector circense dentro das artes escénicas, visibilizando o seu valor cultural, profesional e social. Neste sentido, as actividades que a Asociación vai levar a cabo ano 2026 responden precisamente a esta necesidade, reforzando a presenza do circo contemporáneo en Galicia a través de accións estratéxicas de formación, difusión, preservación do patrimonio e creación de comunidade profesional.

Por isto, para acadar unha maior eficacia na execución de actuacións é polo que se asina este convenio de colaboración, de acordo coas seguintes





CLÁUSULAS

PRIMEIRA. OBXECTO

O obxecto deste convenio de colaboración é o financiamento por parte da Agadic de actividades para a promoción, visibilización e fomento do novo circo galego durante o ano 2026, que organiza a Asociación de Profesionais de Circo de Galicia.

SEGUNDA. IMPOSIBILIDADE DE PROMOVER A CONCORRENCIA PÚBLICA

Tendo en conta o carácter específico da actuación, non procede a realización dunha convocatoria pública con concorrència para a concesión dunha subvención, por ser esta entidade a única que desenvolve unha actividade deste tipo. O carácter representativo da entidade, ao ser a asociación representativa do sector do circo en Galicia, que aglutina na actualidade a 44 persoas asociadas entre artistas, compañías, produtores e outros axentes relacionados coa cultura circense, así como a inclusión desta actividade de fomento dentro da planificación estratéxica da Axencia Galega das Industrias Culturais, xustifica a concesión desta subvención mediante a formalización deste convenio de colaboración.

O proxecto cumpre, por tanto, cos requisitos previstos nos artigos 2 e 19.4.c) da Lei 9/2007, do 13 de xuño, de subvencións de Galicia. De acordo con este último precepto, con carácter excepcional, poderán concederse de forma directa as subvencións para aquelas actuacións que acrediten razóns de interese público, social, económico ou humanitario que dificulten a súa convocatoria pública.

A normativa reguladora de subvencións permite subscribir convenios de colaboración como canle de concesións de subvencións de forma directa, por razóns de interese público debidamente xustificadas, ou ben cando pola singularidade das características da entidade, a especificidade dos servizos que presta ou a especial vulnerabilidade das persoas usuarias, non sexa posible ou conveniente promover a concorrència pública, como é o caso.

TERCEIRA. ACTUACIÓNS DO PROGAMA

A entidade desenvolverá unha serie de accións específicas organizadas en varios eixes de actividades: formativo, investigador e de promoción:

- Curso "Montaña rusa emocional", impartido polo clown e pedagogo Pedro Fabiao, que abordará a relación co público, o uso expresivo das emocións, a improvisación, a estrutura de xogo e autenticidade escénica. Respondendo á demanda de formación avanzada en clown e teatro físico no sector galego, este curso desenvolverase entre o 20 e o 22 de abril en Culleredo.
- Cursos de capacitación técnica en xestión asociativa e económico-financeira, impartidos por César Valencia Rodríguez, que se desenvolverán a través de dúas formacións en liña dirixidas a persoas asociadas ou doutras entidades do sector que desempeñan tarefas de coordinación, produción ou





xestión, reforzando a sustentabilidade da APCG e mellorando as competencias profesionais dos participantes.

- Arquivo do novo circo galego, formado polo censo de artistas, estudo estatístico do sector circense e videoteca histórica do novo circo galego, un traballo vivo e continuo que neste ano se centrará na indexación, que se executará entre os meses de maio a setembro, e a migración e actualización da web, que permitirá modernizar a súa imaxe e funcionalidade coa pretensión de poder integrarse no Observatorio do Teatro Galego.

- Terceira edición dos Premios de Novo Circo Galego Manu Lago, iniciativa que se consolida como referente no sector, que recoñece tres categorías: "Premio Manu Lago de recoñecemento do novo circo galego", outorgado a artista, compañía, entidade ou persoa para recoñecer o seu labor na visibilización, promoción e difusión no novo circo; "Premio Manu Lago ao mellor espectáculo de rúa" e "Premio Manu Lago ao mellor espectáculo de sala", e que celebrará a cerimonia de entrega no mes de outubro no Teatro Principal de Santiago de Compostela.

- Actividades conmemorativas do Día Mundial do Circo, co desenvolvemento de actuacións circenses e de xornadas de difusión na Facultade de INEF da Universidade da Coruña, que teñen como obxectivo principal achegar o circo a novos públicos e fomentar a súa percepción como unha saída profesional viable.

- Actividades de promoción do circo galego fóra de Galicia, coa participación nas asembleas de representantes das diversas asociacións estatais que terá lugar de maneira presencial en Granada e a asistencia á Fira Trapezi, referente internacional desde 1997, feria básica do circo contemporáneo que reúne a compañías, programadoras e axentes culturais nun contexto que combina exhibición artística e espazos de coñecemento mutuo, que terá lugar entre 13 e o 17 de maio de 2026 en Reus.

CUARTA. ORZAMENTO DO PROGRAMA E FINANCIAMENTO

A Agadic realizará unha achega por importe de 10.000,00 € con cargo ás aplicacións orzamentarias 13.A1 432B 781.0 e 13.A1 432B 481.0 que ten atribuídos segundo os orzamentos xerais da Comunidade Autónoma de Galicia para o ano 2026 coa seguinte desagregación:

Aplicación	Importe	Accións conveniadas
13.A1 432B 481.0	3.000 euros	- Curso "Montaña rusa emocional" - Cursos de capacitación técnica en xestión asociativa e económico-financeira
13.A1 432B 781.0	7.000 euros	- Arquivo do novo circo galego - Terceira edición dos Premios de Novo Circo Galego - Actividades conmemorativas do Día Mundial do Circo - Actividades de promoción do circo galego fóra de Galicia





Esta achega canalizarase a través dunha subvención concedida polo procedemento de concesión directa de acordo co establecido nos artigos 19.4.c) e 26 da Lei 9/2007, do 13 de xuño, de subvencións de Galicia, e 36.c) e 40 do seu regulamento, aprobado polo Decreto 11/2009, do 8 de xaneiro.

O custo total das actividades obxecto de subvención é de 19.944,95 €, impostos incluídos, coa seguinte desagregación:

Acción	Custo
Curso "Montaña rusa emocional" e cursos de capacitación técnica en xestión asociativa e económico-financeira	4.830,00
Arquivo do novo circo galego	3.025,00
Terceira edición dos Premios de Novo Circo Galego	9.013,80
Actividades conmemorativas do Día Mundial do Circo	1.382,15
Actividades de promoción do circo galego fóra de Galicia	1.694,00

A xustificación de gastos por importe inferior ao orzamento total da actividade implicará a minoración proporcional do importe da subvención.

QUINTA. PAGAMENTOS ANTICIPADOS

Segundo o estipulado no artigo 63.1 do Regulamento da Lei de Subvencións, poderanse facer pagamentos anticipados que suporán entregas de fondos con carácter previo á xustificación, como financiamento necesario para levar a cabo as actuacións inherentes á actividade subvencionada de acordo coas seguintes condicións:

- Para subvencións correntes, cando o importe da subvención non supere os 18.000 euros, as bases reguladoras poderán prever a concesión de pagamentos anticipados de ata un 80 % da subvención concedida (artigo 63.1 Un).
- Para subvencións de capital, as bases reguladoras poderán prever a concesión de pagamentos anticipados de ata un 50 % da subvención concedida naqueles supostos en que o investimento exixa pagamentos inmediatos. A concesión do anticipo realizarase mediante resolución motivada (artigo 63.1 Dous).

Tendo en conta o anterior, a entidade poderá solicitar os seguintes anticipos:

Aplicación	Accións	Importe convenio	Porcentaxe anticipo	Importe do anticipo
13.A1 432B 481.0	Curso "Montaña rusa emocional" e cursos de capacitación técnica en xestión asociativa e económico-financeira	3.000,00 €	80 %	2.400,00 €
13.A1 432B 781.0	Arquivo do novo circo galego; terceira edición dos Premios de Novo Circo Galego; actividades conmemorativas do Día Mundial do Circo;	7.000,00 €	50 %	3.500,00 €





	actividades de promoción do circo galego fóra de Galicia			
--	---	--	--	--

O artigo 65.1 do Regulamento de subvencións de Galicia establece que os beneficiarios están obrigados á constitución de garantías cando se prevexa a posibilidade de realizar pagamentos á conta ou anticipados. O artigo 65.4.i) recolle que quedarán exonerados da constitución de garantía os beneficiarios das subvencións concedidas cando os pagamentos anticipados non superen os 18.000,00 €.

No caso de que a asociación solicite pagamentos anticipados deberá presentar unha memoria xustificativa e económica na que se recollan as actuacións que ten previsto realizar co custo das actividades.

SEXTA. COMPATIBILIDADE DAS AXUDAS

Esta axuda é compatible con outras subvencións, axudas, ingresos ou recursos para a mesma finalidade, procedentes de calquera Administración ou entes públicos ou privados, nacionais da Unión Europea ou de organismos internacionais.

De conformidade co artigo 17.3 da Lei 9/2007, do 13 de xuño, o importe da subvención en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada.

SÉTIMA. OBRIGAS DA ENTIDADE BENEFICIARIA

1. A entidade beneficiaria deberá cumprir, ademais dos requisitos previstos no artigo 10 da Lei 9/2007, do 13 de xuño, de subvencións de Galicia, os requisitos recollidos no artigo 11 da mesma lei, que a continuación se relacionan:

- Cumprir o obxectivo, executar o proxecto, realizar a actividade ou adoptar o comportamento que fundamenta a concesión da subvención.
- Someterse ás actuacións de comprobación que deba efectuar a Agadic, así como calquera outra comprobación e control financeiro que poidan realizar os órganos de control competentes, tanto nacionais como comunitarios, e achegar canta información lle sexa requirida no exercicio das actuacións anteriores; e conservar os documentos xustificativos de aplicación dos fondos recibidos en canto poidan ser obxecto das actuacións de comprobación e control e de conformidade co procedemento recollido nos artigos 23 e concordantes da Lei de réxime financeiro e orzamentario de Galicia.
- Comunicarlle á Agadic a obtención doutras subvencións, axudas, ingresos ou recursos que financien as actividades subvencionadas, así como a modificación das circunstancias que fundamentasen a concesión da subvención. Esta comunicación deberá efectuarse tan axiña como se coñeza e, en todo caso, con anterioridade á xustificación da aplicación dada aos fondos percibidos.





d) Acreditar que está ao corrente das súas obrigas tributarias e fronte á Seguridade Social e de que non ten pendentes de pagamento débedas coa comunidade autónoma. O cumprimento destes requisitos poderán ser comprobados pola Agadic agás oposición expresa da entidade solicitante. No caso de oposición, deberán achegarse os certificados correspondentes.

e) Dispoñer dos libros contables, rexistros dilixenciados e demais documentos debidamente auditados nos termos esixidos pola lexislación mercantil e sectorial, coa finalidade de garantir o axeitado exercicio das facultades de comprobación e control.

f) Levar unha contabilidade separada ou o establecemento dun código específico en relación cos gastos e ingresos vinculados coa subvención.

g) Dar publicidade do carácter público do financiamento do investimento obxecto de subvención. Incluirase na documentación e soportes específicos das actividades que se trata dunha actuación con financiamento da Xunta de Galicia. Para estes efectos, os materiais ou soportes de difusión deberán incluír o logotipo da Xunta de Galicia e do Xacobeo 2027, agás naqueles materiais que, de forma excepcional, polo seu tamaño ou por necesidades específicas de deseño ou por outras causas debidamente xustificadas, non sexa factible a súa inclusión.

h) Proceder ao reintegro dos fondos percibidos nos supostos previstos no artigo 33 da Lei 9/2007, do 13 de xuño.

2. A entidade debe cumprir coa obriga de subministración de información nos termos establecidos no artigo 4 da Lei 1/2016, do 18 de xaneiro, de transparencia e bo goberno. No caso de que a entidade beneficiaria non atenda ao requirimento de información en prazo, procederase conforme ao establecido no artigo 4.4 da citada lei.

OITAVA. GASTOS SUBVENCIONABLES

1. Considéranse gastos subvencionables aqueles que, de xeito indubidable, respondan á natureza da actividade subvencionada e se realicen no período establecido entre o 1 de xaneiro do 2026 e a data límite de xustificación.

GASTOS SUBVENCIONABLES	IMPORTE sen iva	IMPORTE con iva
1. Curso "Montaña rusa emocional" e cursos de capacitación técnica en xestión asociativa e económico-financeira	4.725,00	4.830,00
<i>Servizos:</i>		
1.1. Impartición do curso "Montaña rusa emocional"	2.500,00	2.500,00
1.2. Impartición dos cursos de capacitación técnica en xestión asociativa e económico-financeira	1.725,00	1.725,00
1.3. Coordinación da formación	500,00	605,00
2. Arquivo do novo circo galego	2.500,00	3.025,00
<i>Servizos:</i>		
2.1. Deseño e actualización web	1.250,00	1.512,50
2.2. Indexación material arquivo	1.000,00	1.210,00
<i>Outros</i>		





2.3. Dominio e hosting	250,00	302,50
3. Terceira edición dos Premios de Novo Circo Galego Manu Lago	7.630,00	9.013,80
<i>Servizos:</i>		
3.1. Coordinación do proxecto	300,00	363,00
3.2. Dirección artística	500,00	550,00
3.3. Producción	500,00	605,00
3.4. Comunicación	400,00	484,00
3.5. Escenografía e vestuario	300,00	363,00
3.6. Servizos técnicos	1.000,00	1.210,00
3.7. Elaboración dos galardóns	900,00	990,00
3.8. Vídeo	500,00	605,00
3.9. Cátering	300,00	363,00
3.10. Presentador gala	300,00	330,00
3.11. Elenco artistas	2.400,00	2.904,00
<i>Subministracións:</i>		
3.12. Consumibles	40,00	48,40
3.13. Roll ups	40,00	48,40
<i>Outros:</i>		
3.14. Desprazamentos	150,00	150,00
4. Actividades conmemorativas do Día Mundial do Circo	1.165,00	1.382,15
<i>Servizos:</i>		
4.1. Impartición do obradoiro circo para persoas con diversidade	415,00	502,15
4.2. Actuación circense e impartición de charla sobre o circo como saída laboral	500,00	605,00
4.3. Coordinación e realización cartalaría	250,00	275,00
5. Actividades de promoción do circo galego fóra de Galicia	1.400,00	1.694,00
<i>Outros:</i>		
5.1. Viaxes, aloxamentos e mantenzas derivadas da asistencia á Fira Trapezi en Reus e á asemblea de representantes circenses en Granada	1.400,00	1.694,00
TOTAL	17.420,00	19.944,95

2. Considerarase gasto realizado o que foi efectivamente pagado con anterioridade á finalización do período de xustificación establecido neste convenio.

3. O prazo de xustificación das actuacións deste convenio remata o **25 de novembro de 2026**. Non obstante, se existen cotas de seguros sociais liquidables e obrigas análogas con posterioridade á data de xustificación, entenderanse xustificadas co feito da súa retención, sen prexuízo de que unha vez ingresados os importes, a entidade deba xustificalo coa entrega dos xustificantes correspondentes, que debe facerse con data límite do 15 de febreiro de 2027.

4. En ningún caso se considerarán gastos subvencionables os impostos indirectos cando sexan susceptibles de recuperación ou compensación nin os impostos persoais sobre a renda. O imposto sobre o valor engadido (IVE) poderase considerar gasto subvencionable cando a entidade beneficiaria declare que se atopa exenta ou suxeita á modalidade de pro rata na declaración do IVE.

5. Os gastos financeiros, os gastos de asesoría xurídica ou financeira, os gastos notariais e rexistrais e os gastos periciais, así como os derivados da garantía bancaria que no seu caso se constituía, para a realización do proxecto subvencionado e os de administración específicos





son subvencionables se están directamente relacionados coa actividade subvencionada e son indispensables para a súa axeitada preparación ou execución.

6. A subcontratación das actividades estará limitada polo disposto no artigo 27 da Lei 9/2007, do 13 de xuño, de subvencións de Galicia e o 43 do seu Regulamento. No caso de subcontratación con persoas ou entidades vinculadas coa beneficiaria, estarase ao indicado no artigo 27.7º d) da Lei de subvencións e no 43.2 do seu Regulamento, que establece que en ningún caso se poderá subcontratar con persoas ou entidades vinculadas coa persoa beneficiaria salvo que a contratación se realice de acordo coas condicións normais do mercado e que se obteña a previa autorización do órgano concedente.

No caso de contratación con persoas vinculadas coa persoa beneficiaria, aterase ao indicado no parágrafo anterior para o caso de subcontratación, debendo obterse, así mesmo, a autorización previa da Agadic.

7. Non se entenderá incumprida a obriga de xustificación das actuacións obxecto deste convenio no caso de variacións das contías previstas nas distintas partidas de gasto establecidas no orzamento de gastos subvencionables sempre que obedezan a razóns xustificadas e que as actuacións realizadas garden relación directa co obxecto do convenio.

NOVENA. XUSTIFICACIÓN E CONDICIÓNS DE PAGAMENTO

A entidade deberá xustificar o custo total da actividade.

1. O pagamento da achega comprometida pola Agadic realizarase da seguinte forma:

a) Ata o 50 % do importe subvencionado na aplicación 13.A1 432B 781.0 e do 80 % na aplicación 13.A1 432B 481.0, segundo o previsto na cláusula quinta deste convenio, poderase aboar en concepto de pagamento anticipado logo da formalización do convenio, despois da presentación por parte da entidade beneficiaria da seguinte documentación:

1. As certificacións de estar ao corrente no cumprimento das obrigas tributarias ou fronte á Seguridade Social e de non ter pendentes de pago ningunha outra débeda coa Administración pública da Comunidade Autónoma.

2. Solicitud de anticipo acompañada dunha memoria xustificativa e económica na que se detallen as actuacións que se prevé realizar e o custo das actividades.

A concesión do anticipo realizarase mediante resolución motivada.

b) As cantidades restantes, logo da presentación da seguinte documentación xustificativa:

1. Memoria de actuación xustificativa do cumprimento das condicións obxecto deste convenio, con indicación das actividades realizadas. Deberá incluír documentación gráfica das actuacións efectuadas e tamén daqueles materiais producidos coa inclusión do logotipo da Xunta de Galicia e o do Xacobeo 2027.





2. Memoria económica explicativa e aclaratoria dos gastos realizados para a realización das actividades convenidas, na que se detallarán as desviacións producidas respecto do orzamento inicialmente presentado e as causas que as motivaron.

No relativo aos gastos de aloxamento, restauración e mantenza, esta memoria deberá conter unha xustificación individualizada, e correlacionada coa correspondente relación clasificada de gastos presentada, de cada un dos gastos incluídos nesta categoría indicando a súa necesidade, as persoas, grupo ou colectivo que os xeraron e a súa vinculación co proxecto subvencionado.

Así mesmo, a memoria deberá recoller todas aquelas circunstancias, incidencias ou particularidades que resulten necesarias para unha adecuada comprensión da relación clasificada de gastos e da documentación xustificativa achegada.

3. Relación clasificada de gastos da actividade, con identificación do acredor (denominación e NIF), nº de factura ou documento de valor probatorio, concepto do gasto claramente expresado, importe, data de emisión, forma de pagamento (transferencia, etc.), data de pagamento e importe. Esta relación debe presentarse clasificada segundo as partidas e subpartidas reflectidas no cadro de gastos subvencionables deste convenio.

4. Copia das facturas ou documentos de valor probatorio equivalente no tráfico xurídico-mercantil e documentación acreditativa do pagamento. Os documentos de gasto e de pagamento deben presentarse clasificados e ordenados segundo a relación clasificada de gastos presentada. Considerarase efectivamente pagado o gasto cando se xustifique o pagamento mediante extractos ou certificacións bancarias, polo que todas as facturas ou documentos de gasto se deberán presentar xunto co correspondente documento bancario xustificativo no que veña claramente identificado o destinatario do pagamento.

No caso de premios de contido económico, deben xustificarse coa achega, ademais do xustificante de pagamento correspondente, da acta do xurado, resolución ou documento acreditativo equivalente.

Admítese a xustificación do gasto mediante factura simplificada nos supostos autorizados pola normativa vixente, que en ningún caso se pode aboar en metálico e na que deben figurar: número e, no seu caso, serie, data de expedición, datos fiscais do emisor, identificación do produto ou servizo prestado, importe total e o tipo de IVE aplicado.

Para gastos derivados de colaboracións esporádicas prestadas por profesionais tales como conferencias, cursos, charlas ou similares, poderase admitir o recibo correspondente no que deberán constar nome e o NIF da persoa que realiza a actividade, datos da entidade beneficiaria, concepto, lugar e data de realización, importe, retención correspondente e sinatura da persoa. Debe acompañarse, como o resto dos gastos, das xustificacións bancarias dos pagamentos.

5. No caso de pagamentos realizados mediante tarxeta de crédito/débito, deberá xuntarse, ademais, acreditación da súa titularidade. A tarxeta debe estar asociada á conta da entidade beneficiaria. Non se admitirán pagamentos mediante tarxetas non asociadas á conta da entidade.





6. Para os gastos de desprazamento, admitirase como documento de gasto unha axuda de custo en que quede perfectamente identificado quen realiza o pagamento (a entidade) e a persoa destinataria. Neste documento deberase especificar o motivo do desprazamento, as datas das viaxes, orixe e destino, quilómetros totais no seu caso, e gastos asociados á viaxe (peaxe, aparcamento e combustible). En caso de vehículo particular, a cantidade que se admitirá por cada quilómetro será de 0,26 euros. Deben acompañarse, como o resto dos gastos, das certificacións bancarias dos pagamentos.

7. En relación aos documentos que acrediten os custos de persoal: a copia das nóminas e relación nominal de traballadores (RNT) e o seu pagamento (xustificantes bancarios das nóminas e recibos de liquidación á Seguridade Social [RLC] e documento acreditativo do ingreso.

8. En relación ás nóminas e facturas con retención de IRPF, deberá presentarse o modelo 111 (retencións e ingresos a conta do IRPF) dos trimestres correspondentes á xustificación entregada, así como xustificación acreditativa do ingreso.

9. Declaración responsable que conteña unha relación detallada, se é o caso, doutros ingresos ou subvencións que financiasen a actividade subvencionada con indicación do importe e a súa procedencia. No caso contrario, presentarán declaración de non ter solicitado nin concedido ningunha outra axuda para a actividade subvencionada. De conformidade co artigo 17.3 da Lei 9/2008, do 13 de xuño, o importe da subvención ningún caso poderá ser de tal contía que illadamente ou en concorrencia con outras subvencións, axudas, ingresos ou recursos, supere o custo da actividade subvencionada.

10. Os tres orzamentos que, en aplicación do artigo 29.3 da Lei de subvencións de Galicia, deba solicitar a entidade beneficiaria. A este respecto, para aqueles casos en que a contía supere os límites legalmente establecidos para o contrato menor, a entidade deberá solicitar como mínimo tres ofertas de diferentes provedores con carácter previo á contratación do compromiso para a prestación do servizo, salvo que polas especiais características dos gastos subvencionables non exista no mercado suficiente número de entidades que o subministren ou presten, ou salvo que o gasto se realizase con anterioridade á solicitude da subvención. A elección entre as ofertas presentadas, que deberán achegarse na xustificación, realizarase de conformidade con criterios de eficiencia e economía, e deberá xustificarse expresamente nunha memoria a elección cando non recaia na proposta económica máis vantaxosa.

11. A acreditación de estar ao corrente de obrigas tributarias e coa Seguridade Social, mediante:

- Certificación positiva de atoparse ao corrente no cumprimento das súas obrigas tributarias, expedida pola Axencia Estatal de Administración Tributaria (AEAT).
- Certificación positiva de non ter contraída ningunha débeda de natureza tributaria coa Facenda Pública da Comunidade Autónoma, expedida pola Axencia Tributaria de Galicia (ATRIGA).
- Certificación positiva de atoparse ao corrente no cumprimento das súas obrigas coa Seguridade Social, expedida pola Tesourería da Seguridade Social.





A Agadic poderá consultar a través de medios de interoperabilidade os datos elaborados polas Administracións públicas sobre a situación de que a entidade se atopa ao corrente das súas obrigas tributarias e fronte á Seguridade Social e que non ten pendente de pagamento ningunha outra débeda coa Administración Pública da Comunidade Autónoma, agás que medie oposición expresa da entidade, en cuxo caso a entidade deberá achegar a citada documentación.

12. Declaración de non estar incurso en ningunha das circunstancias para obter a condición de beneficiaria das subvencións reguladas na Lei 9/2007, do 13 de xuño, de subvencións de Galicia, recollidas no artigo 10 da Lei.

13. Certificación de encontrarse acollida ao réxime de exención (ou rateo) do IVE no seu caso.

A documentación correspondente á xustificación presentarase de forma electrónica a través da sede electrónica da Xunta de Galicia (<http://sede.xunta.gal>).

Á vista desta documentación, o órgano competente da Axencia Galega das Industrias Culturais comprobará a realización da actividade e o cumprimento da finalidade da subvención e, unha vez comprobado o cumprimento, expedirá certificado acreditativo da verificación realizada e tramitará o pagamento á entidade.

A Axencia Galega das Industrias Culturais reservarase o dereito a solicitar toda a documentación que se considere precisa en relación coa xustificación do obxecto do presente convenio.

2. O prazo para presentar a documentación xustificativa da subvención por parte da entidade beneficiaria remata o 25 de novembro de 2026.

DÉCIMA. PERSOAL E RELACIÓNS LABORAIS

1. A selección do persoal específico que a entidade dedicará á execución do programa corresponderalle a esta.

2. A sinatura deste convenio non comporta relación laboral, contractual ou de calquera outro tipo entre os profesionais que van desenvolver as actividades e a Agadic, de xeito que non se lle poderá esixir a esta ningunha responsabilidade, nin directa, nin indirecta, nin subsidiaria, polos actos ou feitos ocorridos durante a execución das actuacións e/ou a vixencia deste convenio.

DÉCIMO PRIMEIRA. PUBLICIDADE DO CONVENIO

1. Este convenio será obxecto de publicidade e inscrición de conformidade co disposto no artigo 15 da Lei 1/2016, do 18 de xaneiro, e no Decreto 126/2006, do 20 de xullo, polo que se regula o rexistro de convenios da Xunta de Galicia. Así mesmo, será obxecto de publicación e inscrición en cumprimento do disposto no artigo 17 da Lei 1/2016, do 18 de xaneiro, o artigo 15 da Lei 9/2017, do 13 de xuño, e no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006.





2. De conformidade coa Lei 38/2003, do 17 de novembro, xeral de subvencións, o instrumento de colaboración e a información sobre a subvención serán comunicados á Base de Datos Nacional de Subvencións (BDNS).
3. As partes asinantes deberán cumprir coas obrigas derivadas da entrada en vigor da Lei 1/2016, do 18 de xaneiro, de transparencia e bo goberno. Para estes efectos, os asinantes prestan consentimento ou autorización para que os seus datos persoais que consten no convenio, e mais o resto das especificacións contidas nel, poidan ser publicados no Portal da Transparencia e Goberno Aberto. Así mesmo, os asinantes aceptan e consenten a remisión do convenio, logo da súa sinatura, ao Rexistro de Convenios da Xunta de Galicia.

DÉCIMO SEGUNDA. COMISIÓN DE SEGUIMIENTO DO CONVENIO

1. De acordo co previsto no artigo 49.f da Lei 40/2015, do 1 de outubro, de réxime xurídico do sector público, créase un órgano mixto de vixilancia e control da execución e aplicación deste convenio e de resolución de controversias administrativas. A esta comisión mixta de seguimento serán sometidas todas as cuestións derivadas do desenvolvemento deste convenio e non recollidas nel, e, con carácter previo, aquelas que impliquen desconformidade por algunha das partes asinantes.
2. Esta comisión estará composta polos seguintes membros:
 - A persoa titular da presidencia da entidade beneficiaria ou persoa que legalmente a represente, ou unha persoa da entidade que a substitúa.
 - A persoa titular da Dirección da Agadic actuará como presidente e a suplencia exercerase pola persoa titular do Departamento de Coordinación Xeral e Xerencia da Agadic.
3. Actuará como secretario ou secretaria, con voz pero sen voto, un membro do cadro do persoal da Agadic.

DÉCIMO TERCEIRA. INFORMACIÓN BÁSICA SOBRE PROTECCIÓN DE DATOS DE CARÁCTER PERSOAL

Responsable do tratamento	Xunta de Galicia – Axencia Galega das Industrias Culturais
Finalidades do tratamento	Xestión e tramitación das axudas, bolsas e subvencións, convenios nominativos e premios que teñen a tramitación de subvencións.
Lexitimación para o tratamento	O cumprimento dunha tarefa realizada en interese público ou no exercicio de poderes públicos: Lei 38/2003, do 17 de novembro, Xeral de Subvencións. Lei 9/2007, do 13 de xuño, de Subvencións de Galicia
Destinatarios dos datos	Consellería de Facenda e Administración Pública. Base de Datos Nacional de Subvencións.





Exercicio de dereitos	As persoas interesadas poderán solicitar ante o responsable do tratamento o acceso, rectificación, oposición, limitación, portabilidade e supresión dos seus datos, ou retirar no seu caso o consentimento outorgado, a través da sede electrónica da Xunta de Galicia ou nos lugares e rexistros establecidos na normativa reguladora do procedemento administrativo común segundo se recolle en https://www.xunta.gal/exercicio-de-dereitos .
Contacto delegado/a de protección de datos e información adicional	https://www.xunta.gal/informacion-xeral-proteccion-datos

DÉCIMO CUARTA. PERDA DO DEREITO Á SUBVENCIÓN, REINTEGRO E SANCIÓN

1. Producirase a perda do dereito ao cobramento do importe do convenio no suposto de falta de xustificación do cumprimento do proxecto, das condicións impostas no clausulado deste convenio, das obrigas contidas no artigo 33 da Lei 9/2007, de subvencións de Galicia, ou na demais normativa aplicable, o que dará lugar á obriga de devolver total ou parcialmente o anticipo percibido, así como os xuros de demora correspondentes.
2. O procedemento para declarar a procedencia da perda do dereito de cobramento da subvención e para facer efectiva a devolución a que se refire o punto anterior será o establecido no Título II da Lei 9/2007, do 13 de xuño, de subvencións de Galicia.
3. Procederá a perda total do dereito ao cobramento da axuda concedida nos seguintes casos:
 - a) Non xustificar ante a Agadic o cumprimento do obxecto do convenio e a execución do proxecto.
 - b) Non comunicarlle á Agadic a obtención doutras subvencións, axudas, ingresos ou recursos que financien as actividades subvencionadas, así como a modificación das circunstancias que fundamentasen a concesión da subvención.
 - c) Non permitir someterse ás actuacións de comprobación que deba efectuar a Agadic, así como calquera outra comprobación e control financeiro que poidan realizar os órganos de control competentes, tanto nacionais como comunitarios, nin achegar tanta información lle sexa requirida no exercicio das actuacións anteriores.
 - d) Non acreditar que está ao corrente das obrigas tributarias e fronte á Seguridade Social e de que non ten pendentes de pagamento débedas coa comunidade autónoma.
4. Procederá a perda parcial do cobramento da subvención o incumprimento parcial, entendendo por este sempre que se cumpran os requisitos ou condicións esenciais tomados en conta na concesión da axuda. A Agadic poderá apreciar un incumprimento parcial e deberá resolver o seu alcance (e, se é o caso, establecendo a obriga de reintegro) cos seguintes criterios:
 - No caso de condicións referentes á contía subvencionable, o alcance do cumprimento determinarase proporcionalmente ao gasto deixado de practicar e, se é o caso, deberán reintegrarse as cantidades percibidas na dita proporción e os seus xuros de demora.





- No caso de incumprimento da obriga de dar publicidade do carácter público do financiamento do investimento obxecto de subvención, coa inclusión do logotipo da Xunta de Galicia na documentación e soportes de difusión das actividades (agás naqueles materiais en que, de forma excepcional, polo seu tamaño ou por necesidades específicas de deseño, ou por outras causas debidamente xustificadas, non sexa factible a súa inclusión), reducirase un 2 % o importe da subvención, e, se é o caso, deberán reintegrarse as cantidades percibidas nesa proporción.

5. Para facer efectiva a devolución, tramitarase o oportuno procedemento de reintegro, que se axustará ao previsto no título II da Lei 9/2007, do 13 de xuño, de subvencións de Galicia.

6. Será de aplicación o réxime de infraccións e sancións previsto no Título IV da lei 9/2007, do 14 de xuño, de subvencións de Galicia.

DÉCIMO QUINTA. MODIFICACIÓN E RESOLUCIÓN DO CONVENIO DE COLABORACIÓN

1. As modificacións do convenio adoptaranse por acordo expreso e escrito das partes asinantes e de acordo cos trámites que esixa a normativa vixente.

2. Serán causas de resolución deste convenio as seguintes:

a) Incumprimento de calquera das cláusulas establecidas neste.

b) A aplicación dos fondos outorgados no convenio para fins distintos dos que motivaron a concesión.

c) Os supostos previstos no artigo 32 e 33 da Lei 9/2007, do 13 de xuño. A tramitación do procedemento de reintegro realizarase de conformidade co disposto no título II da Lei 9/2007, do 13 de xuño, e no título V do Decreto 11/2009, do 8 de xaneiro.

3. En caso de resolución, o convenio terá os efectos establecidos no artigo 52 da Lei 40/2015, do 1 de outubro.

4. Os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sostenibilidade financeira. As ditas modificacións terán por obxecto a redución do volume das obrigas ou a ampliación do seu prazo de execución.

DÉCIMO SEXTA. NORMATIVA APLICABLE E XURISDICIÓN

Aínda que é un dos excluídos do ámbito de aplicación da Lei 9/2017, do 8 de novembro, de contratos do sector público (BOE 9-11-2017) segundo especifica o seu artigo 6, ao non previsto e de acordo co artigo 4 da citada lei, aplicaráselle os principios recollidos nela, co fin de resolver as dúbidas e omisións que puidesen presentarse. Así mesmo, supletoriamente terase en conta o Decreto lexislativo 1/1999, do 7 de outubro, polo que se aproba o texto refundido da Lei de réxime financeiro e orzamentario de Galicia e demais normativa vixente na materia.





Este convenio ten natureza administrativa. A xurisdición contencioso administrativa será competente para dirimir as cuestións que puidesen xurdir da aplicación deste convenio.

Será de aplicación a Lei 40/2015, do 1 de outubro, de réxime xurídico do sector público, e a Lei 9/2007, de 13 de xuño, de subvencións de Galicia e o Decreto 11/2009, de 8 de xaneiro, polo que se aproba o seu regulamento.

DÉCIMO SÉTIMA. ADMINISTRACIÓN DIXITAL

As partes asinantes deste convenio respectarán cantas esixencias establece a Lei 4/2019, do 17 de xullo, de administración dixital de Galicia (DOG 26 de xullo de 2019), que será aplicable ao sector público autonómico, integrado, de acordo co artigo 3 da Lei 16/2010, do 17 de decembro, de organización e funcionamento da Administración xeral do sector público autonómico de Galicia, pola Administración xeral e polas entidades instrumentais e, tamén, será aplicable á cidadanía que ten o deber de utilizar os servizos públicos dixitais que se poñan a súa disposición de xeito adecuado, co respecto das normas de uso, xerais ou específicas, que se establezan para cada un dos servizos e, en particular, os cidadáns e as cidadás deberán utilizar os sistemas de identificación e de sinatura electrónicas de que sexan lexítimos titulares, usar a información dispoñible conforme a política de privacidade publicada e respectar a normativa en materia de protección de datos de carácter persoal (artigos 2 a) e b) e 7 apartados 1 e 2 respectivamente da citada lei).

DÉCIMO OITAVA. VIXENCIA DO CONVENIO

Este convenio estará en vigor dende o día da súa sinatura ata o 30 de decembro de 2026. Non obstante, abranguerá as accións obxecto do convenio que se realicen pola entidade dende o 1 de xaneiro de 2026.

DÉCIMO NOVENA. NOTIFICACIÓN ELECTRÓNICA

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notific@, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o





interesado pode autorizar a calquera outra persoa a acceder ao contido das súas notificacións.

VIXÉSIMA. DELEGACIÓN DE COMPETENCIAS E HABILITACIÓN PARA O DESENVOLVEMENTO

De conformidade coa disposición adicional primeira do Acordo do 24 de xullo de 2012 do Consello Reitor da Axencia Galega das Industrias Culturais, relativa á delegación de competencias na persoa titular da Dirección do organismo en materia de de axudas e subvencións públicas, delégase no director da Agadic a facultade para adoptar cantos actos e resolucións sexan necesarios para o desenvolvemento, xestión e execución do presente convenio de subvención, tales como as modificacións, aceptacións de renuncias, acordos de inicio e resolucións de procedementos de reintegro e perdas de dereito total ou parcial ao cobramento da subvención.

Este convenio obriga ás partes que o asinan ao seu cumprimento e ambas as dúas sométense ao acordado en todas as cláusulas.

E en proba de conformidade de canto antecede, asinan este convenio na data que figura na marxe

**POLA POLA AXENCIA GALEGA
DAS INDUSTRIAS CULTURAIS**

**POLA ASOCIACIÓN DE PROFESIONAIS
DE CIRCO DE GALICIA**

José Carlos López Campos

Presidente do Consello Reitor da Agadic

Isaac Rodríguez Miranda

Presidente

